

**அப்போஸ்தலனாயிப்பா பவுலு**  
**பிலிப்பிக்காறிக**  
**எளிதிதா கத்து**

**ஈ புஸ்தகத பற்றிட்டுள்ளா செல காரெ**

கிறிஸ்தின அப்போஸ்தலனாயிப்பா பவுலு, பிலிப்பி பட்டணதாளெ ஏசின நம்பா ஆள்க்காறிக பேக்காயி ஈ கத்தின சமாரு கி. பி. 57-58 மாத்த வர்ஷத எடேகுள்ளா காலகட்டதாளெ எளிதிதாங்; அவங் ரோமா பட்டணத ஜெயிலாளெ இப்பங்ங ஈ கத்தின எளிதிதாங்; ஏசினபற்றிட்டுள்ளா ஒள்ளெவர்த்தமானத அறிசிதாகண்டு பவுலின ஜெயிலாளெ ஹைக்கிரு; அதுகொண்டு அவங் ஜெயிலாளெ இத்தங்ஙம், சந்தோஷத்தோடெ இத்து, ஏசின நம்பா ஆள்க்காரும் ஏகோத்தும் சந்தோஷமாயிற்றெ இருக்கு ஹளி ஈ கத்தின எளிதிதீனெ; கிறிஸ்து எந்தெ தாழ்மெ உள்ளாவனாயி ஜீவிசினோ அதே ஹாற தென்னெ தன்ன நம்பாக்களும் தாழ்மெ உள்ளாக்களாயி ஜீவுசுக்கு ஹளி எளிதிதீனெ; கிறிஸ்தினகூடெ ஐக்கியமாயிற்றெ இப்பா ஜீவித, யூதமத சட்டங்ஙளு அனிசரிசி நெடெவுதுகொண்டு கிட்ட ஹளியும், தெய்வதமேலெ உள்ளா நம்பிக்கெ கொண்டே கிட்டுகு ஹளிட்டுள்ளுதன ஆக்காக ஓர்மெபடுசத்தெ பேக்காயிற்றெ எளிதிதாங்; பிலிப்பி பட்டணதாளெ ஏசின நம்பாக்க பவுலின ஆவிசெகுள்ளா ஹண கொட்டாயிச்சித்துரு; அதங்ஙபேக்காயி ஆக்க நண்ணி ஹளியும் ஈ கத்து எளிதிதீனெ.

**ஈ புஸ்தகத உள்ளடக்க**

தொடக்க பாக (1:1-11)

பவுலா நெலெமெ (1:12-26)

கிறிஸ்தினகூடெ ஐக்கியமாயிற்றுள்ளா ஜீவித (1:27-2:18)

தீத்து, எப்பாப்பிராத்து ஹளாக்கள உத்தேச (2:19-30)

எதிராளிகளா பற்றியும், ஆபத்தின பற்றியும், ஜாகர்தெயாயிற்றெ இப்பத்தெ ஹளுது (3:1-4:9)

பவுலும், பிலிப்பி பட்டணதாளெ இப்பா தன்ன சினேகிதம்மாரும் (4:10-20)

முடிவு பாக (4:21-23)

**பிலிப்பி சபெக்காறிக பவுலு வாழ்த்து ஹளுது (1:1,2)**

**1** பிலிப்பி பட்டணதாளெ, கிறிஸ்து ஏசின நம்பா பரிசுத்தம்மாராயிப்பா நிங்காகும், நிங்கள சபெ மூப்பம்மாரிகும், நிங்களகாரெ ஒக்க நோடி நெடத்தா ஆள்க்காறிகும், ஏசுக்கிறிஸ்தின சேவெக்காறாயிப்பா பவுலும் திமோத்தியும்கூடி எளிவா கத்து ஏன ஹளிங்ங; நிங்கள அப்பனாயிப்பா தெய்வதப்பெடந்தும், நிங்கள எஜமானனாயிப்பா ஏசுக்கிறிஸ்தினப்பெடந்தும் நிங்காக கருணையும், சமாதானும் கிட்டட்டெ. <sup>3</sup>நா நிங்கள ஓர்ப்பங்ங ஒக்க, நிங்கள தெய்வாக நண்ணி ஹளுதாப்புது. <sup>4</sup>நிங்க எல்லாரிக பேக்காயும் நா தெய்வதகூடெ பிரார்த்தனெ கீவங்ங ஒக்க வளரெ சந்தோஷத்தோடெ பிரார்த்தனெகீதீனெ.

ஒள்ளெவர்த்தமான அருசத்தெ நங்களும் கைத்தாங்லாயி இருக்கு.

### பிலிப்பி சபெக்காறிக நண்ணி ஹளுது (1:4-8)

<sup>5</sup>ஏனாகஹளிங்ங ஏசுக்கிறிஸ்தின பற்றிட்டுள்ளா ஒள்ளெவர்த்தமான நிங்க கேட்டாஜினமொதுலு இந்துவரெ மற்றுள்ளாக்காக ஒள்ளெவர்த்தமான அருசத்தெபேக்காயி நனங்ங கைத்தாங்ஙலாயிறெ இத்தீரல்லோ! <sup>6</sup>இந்த்தல ஒள்ளெகாரெ கீயிக்கு ஹளி நிங்காக மனசு தந்து தொடங்ஙி பீத்துது தெய்வ தென்னெயாப்புது; ஆ தெய்வ, கிறிஸ்து ஏசு திரிச்சு பொப்பா ஜினட்ட இந்த்தல ஒள்ளெ காரெ ஒக்க கீவத்தெபேக்காயி நிங்காக சகாசி தக்கு ஹளி நனங்ங ஒறப்பு உட்டு. <sup>7</sup>நிங்க எல்லாரும் நன்ன மனசினாளெ உள்ளாக்களாப்புது; நிங்களபற்றிட்டுள்ளா நன்ன சிந்தெ தெற்றல்ல ஹளியாப்புது நா பிஜாருசுது; ஏனாக ஹளிங்ங, நா ஒள்ளெவர்த்தமான அருசதாப்பங்ங ஜனங்ஙளு ஒக்க அது தெற்றாப்புது ஹளி நன்னகூடெ தர்க்கிசிரு; எந்நங்ங நா புட்டுகொட்டுபில்லெ; நா அறிசிது செரிதென்னெயாப்புது ஹளி ஹளிதிங்; ஆ சமெயாளெயும் ஒள்ளெவர்த்தமான அறிசிதுகொண்டு நா ஜெயிலாளெ இப்பங்ஙகூடி நிங்களாப்புது நன்ன சகாசிது; தெய்வ கருணெ காட்டிது கொண்டாப்புது நங்காக இந்த்தெ ஒக்க கீவத்தெ பற்றிது. <sup>8</sup>கிறிஸ்து ஏசு, தன்ன ஜீவனஹாற நங்கள எல்லாரினும் சினேகிசினல்லோ? அதேஹாற நா நிங்கள எல்லாரினும் சினேகிசீனெ ஹளிட்டுள்ளுதும், நா நிங்கள காம்பத்தெ கொதிச்சீனெ ஹளிட்டுள்ளுதும் தெய்வாக கொத்துட்டு.

### பவுலு சபெக்காறிக பிரார்த்தனெ கீவுது (1:9-11)

<sup>9</sup>நிங்க தம்மெலெ, கூடுதலு சினேக உள்ளாக்க ஆயிருக்கு ஹளியும், தெய்வகாரெபற்றி கூடுதலாயிறெ அறிவுள்ளாக்களாயி ஆயிருக்கு ஹளியும், நிங்கள ஜீவிதாளெ ஒள்ளெது ஏது ஹொல்லாத்துது ஏது ஹளி திரிச்சறிவத்துள்ளா அறிவு உள்ளாக்களாயிருக்கு ஹளியும், நா தெய்வதகூடெ பிரார்த்தனெ கீவுதாப்புது. <sup>10</sup>ஏனாக ஹளிங்ங, ஏசுக்கிறிஸ்து திரிச்சு பொப்பா ஜினட்ட குற்ற கொறவில்லாத்த ஒந்து ஜீவித எந்த்தெ ஜீவுசுது ஹளியும் அதனும் மேலெகுள்ளுதன எந்த்தெ தெரெஞ்ஞெத்துது ஹளிட்டுள்ளா அறிவும் கிட்டெ.

<sup>11</sup>ஏசுக்கிறிஸ்து தப்பா சக்திகொண்டு நிங்க எல்லா ரீதியாளெயும் அனேக ஒள்ளெ காரெ கீவாக்களாவுக்கு அந்த்தெ தெய்வாக பெகுமானும், புகழ்ச்செயும் உட்டாப்பத்தெ பேக்காயிறும் நா நிங்காகபேக்காயி தெய்வதகூடெ பிரார்த்தனெ கீவுதாப்புது.

### அசுயங்கொண்டு ஒள்ளெவர்த்தமான அருசு (1:12-16)

<sup>12</sup>நன்ன ஹாற ஏசின நம்பா கூட்டுக்காரெ, நனங்ங கஷ்டப்பாடு ஒக்க கூடுதலு ஆள்க்காறிக ஏசின பற்றிட்டுள்ளா ஒள்ளெவர்த்தமான கேளத்தெ உபகார பட்டுத்து ஹளிட்டுள்ளுது நிங்க மனசிலுமாடுக்கு ஹளி நனங்ங ஆக்கிர உட்டு. <sup>13</sup>எந்த்தெ ஹளிங்ங,

கிறிஸ்து தன்ன ஜீவனஹாற நங்கள எல்லாரினும் சினேகிசிதா ஹாற தென்னெ பவுலும் பிலிப்பி சபெயாளெ இப்பா தெய்வமக்களமெலெ சினேக பீத்துதீனெ. நங்களும் தம்மெலெ தம்மெலெ உள்ளா சீனேக இப்பிரகாரமாயி இருக்கு.

ஒள்ளெது ஏது ஹொல்லாத்துது ஏது ஹளிட்டுள்ளா திரிச்சறிவுள்ளாக்களாயி இப்பத்தெ தெய்வதகூடெ பிரார்த்தனெ கீயிக்கு.

கிறிஸ்து பொப்பா ஜினட்ட குற்ற கொறவில்லாத்த ஜீவித ஜீவுசுக்கு.

நங்க ஒள்ளெகாரெ கீவுதனாளெ தெய்வாக புகழ்ச்செ உள்ளாக்களாயி ஜீவுசுக்கு.

ஏசுக்கிறிஸ்திகபேக்காயி கெலச கீவுதுகொண்டாப்புது நா ஜெயிலாளெ இப்புது ஹளி கவர்னறா கொட்டாரதாளெ உள்ளா காவல்காறிகும், மற்றுள்ளா ஆள்க்காறிகும் கொத்துட்டு.

<sup>14</sup>நா ஜெயிலாளெ இப்புதுகொண்டு, ஏசின நம்பாக்களாளெ ஒந்துபாடு ஆள்க்காரு, எஜமானனாயிப்பா ஏசுக்கிறிஸ்தினமேலெ ஒறச்ச நம்பிக்கெ பீத்து, அஞ்சிக்கெ இல்லாதெ மற்றுள்ளா ஆள்க்காறிக ஒள்ளெவர்த்தமான அறிசீரெ.

<sup>15</sup>பேறெ செலாக்க நன்னமேலெ உள்ளா ஹொட்டெகிச்சு கொண்டும், வைராக்கெ கொண்டும் ஆப்புது கிறிஸ்தின பற்றிட்டுள்ளா ஒள்ளெவர்த்தமான அருசுது; எந்நங்ங செலாக்க ஒள்ளெ மனசோடெ கிறிஸ்தினபற்றி அறிசீரெ. <sup>16</sup>ஆக்காக நன்னமேலெ உள்ளா சினேகங்கொண்டாப்புது ஒள்ளெவர்த்தமான அருசுது. அதுமாத்தறல்ல, ஒள்ளெவர்த்தமான நேருள்ளுதாப்புது ஹளி தெளுசத்தெ பேக்காயி, தெய்வ நன்ன நேமிசி ஹடதெ ஹளிட்டுள்ளுதும் ஆக்க மனசிலுமாடி ஒள்ளெவர்த்தமான அறிசீரெ.

### ஒள்ளெமனசோடெ ஒள்ளெவர்த்தமான அருசுது (1:17-18)

<sup>17</sup>எந்நங்ங செலாக்க ஒள்ளெவர்த்தமான அருசுது போத்த சிந்தெ கொண்டாப்புது; அந்த்தலாக்க, ஆக்கள தென்னெ தொட்டாவாங் ஹளி காட்டத்தெ பேக்காயிற்றெ ஆப்புது அந்த்தெ கீவுது. <sup>18</sup>இதனாளெ நனங்ங ஏன ஹடதெ? போத்த சிந்தெகொண்டோ ஒள்ளெ மனசு கொண்டோ, எந்த்தெ ஆதங்ஙம் பேக்காதில்லெ, கிறிஸ்தினபற்றி ஜனங்ஙளு அருதங்ஙமதி; அதுகொண்டு நனங்ங சந்தோஷெ ஒள்ளு; இஞ்சி சந்தோஷப்படுவிங்.

### சத்தங்ஙம் ஜீவோடெ இத்தங்ஙம் கிறிஸ்திக பேக்காயி (1:19-26)

<sup>19</sup>அந்த்தெ நிங்கள பிரார்த்தனெ கொண்டும், ஏசுக்கிறிஸ்து தப்பா ஆல்பமாவின சகாயகொண்டும் நனங்ங விடுதலெ கிட்டத்தெ எடெயாக்கு ஹளி நனங்ங கொத்துட்டு. <sup>20</sup>எந்நங்ங கூடி, நா ஜெயிலாளெ இப்பத்தெ வேண்டிபந்நங்ஙம் செரி, இல்லிதென்னெ சாயிவத்தெ வேண்டிபந்நங்ஙம் செரி, நனங்ங நாணக்கேடு ஒந்தும் இல்லெ; நா ஏகோத்தும் ஒள்ளெ தைரெயாயிற்றெ இப்பிங்; ஏனகொண்டு ஹளிங்ங, நா ஜீவோடித்தங்ஙம் செரி, சத்தங்ஙம் செரி ஏகோத்தும் தெய்வாக ஒள்ளெ ஹெசறு உட்டாக்கு ஹளி நனங்ங ஒறப்பட்டு; அதுதென்னெயாப்புது நன்ன ஆசெ; அதங்ங பேக்காயிற்றெ ஆப்புது நா காத்திப்புதும். <sup>21</sup>நா ஜீவிசிதங்ஙம் கிறிஸ்திக பேக்காயி தென்னெயாப்புது ஜீவுசுது; சத்தங்ஙம் நனங்ங நஷ்ட ஒந்தும் இல்லெ. ஏனகொண்டு ஹளிங்ங, நா சத்தங்ஙம் கிறிஸ்தினகூடெ தென்னெயாப்புது இப்பத்தெ ஹொப்புது. <sup>22</sup>எந்நங்ஙம் நா ஜீவோடெ இப்புதுகொண்டு, கிறிஸ்திக பிரயோஜன உள்ளா கெலச கீவத்தெபற்றுகு; அதுகொண்டு கிறிஸ்திக பேக்காயி ஆக்க நன்ன கொல்லுதனோ, கிறிஸ்திக பேக்காயி ஜீவோடெ இத்து கெலச கீவுதோ, இதனாளெ ஏதனாப்புது நா ஆக்கிருசுது ஹளி நனங்ங கொத்தில்லெ. <sup>23</sup>நா இது எருடு காரெத எடநடுவுள்ளா ஹிடிபலியாளெ ஆப்புது இப்புது. நா சத்துகளிளுட்டு, கிறிஸ்தினகூடெ

ஹொட்டெகிச்சுகொண்டு ஏதனும் கீவத்தெ பாடில்லெ. சினேகங்கொண்டு கிறிஸ்தின பற்றிட்டுள்ளா ஒள்ளெவர்த்தமான அருசுக்கு.

ஒள்ளெவர்த்தமான அறிசிதுகொண்டு பவுலு ஜெயிலாளெ இப்பா ஹேதினாளெ கொறச்ச ஹூலுங்கூடி கிட்டட்டெ ஹளி, செலாக்க அசயங்கொண்டு ஒள்ளெவர்த்தமான அறிசிரு. அதுகொண்டு பவுலு சாரில்லெ, எந்த்தெ ஆதங்ங கிறிஸ்தினபற்றி மற்றுள்ளாக்க அருதங்ஙமதி ஹளி ஹளிதாங். இந்து இப்பிரகார செல ஆள்க்காரு நங்கள எடெக இத்தங்ஙம், நங்க தெய்வாக பேக்காயி நிந்நங்ங மதி.

கிறிஸ்திக பேக்காயி கஷ்ட சகிப்புது நாணக்கேடல்ல.

இப்புதாயிக்கு நனங்ங ஒள்ளேது ஹளி நா ஆக்கிருசுதாப்புது; ஏனாக ஹளிங்ங அதாப்புது ஏற்றும் ஒள்ளேது.

<sup>24</sup>நிங்க கிறிஸ்தினகூடெ சேர்ந்நு ஜீவுசத்தெபேக்காயி, நா ஜீவோடிப்புது தீர்ச்செயாயிற்றும் ஒள்ளேது தென்னெயாப்புது. <sup>25</sup>ஆ ஒறப்பு நனங்ங உள்ளுதுகொண்டு, நிங்க கிறிஸ்தினமேலெ உள்ளா நம்பிக்கெயாளெ வளரத்தெ பேக்காயும், நிங்கள ஜீவிதாளெ சந்தோஷ உட்டாப்பத்தெ பேக்காயும் நா நிங்களகூடெ ஜீவோடெ இப்பிங் ஹளி நா மனசிலுமாடி ஹடதெ. <sup>26</sup>அந்ததெ நா விடுதலெஆயி நிங்களப்படெ திரிச்சு பந்நங்ங, ஏசுக்கிறிஸ்தினகூடெ ஜீவுசா நிங்கள ஜீவித ஏமாரி ஒள்ளேது ஹளி நிங்காக பெருமெ ஹளத்தெ பற்றுகு.

### ஏசின நம்பாக்காகுள்ளா கஷ்டப்பாடு (1:28-30)

<sup>27</sup>நிங்க கிறிஸ்தின ஒள்ளெவர்த்தமானாக ஏற்றா ஹாற மாத்தற நெடதணிவா; நா நிங்களப்படெ பந்தட்டு, நிங்கள கண்டங்ஙம் செரி, நிங்கள நெலவார ஒக்க தூரந்த கேட்டங்ஙம் செரி, ஒள்ளெவர்த்தமானகொண்டு நிங்காக கிட்டிதா நம்பிக்கெத புட்டுடாதெ, நிங்களகூடெ எதிர்த்து ஹளாக்கள முந்தாக நிங்க ஒரிமெ உள்ளாக்களாயி மனசொறச்சு நில்லிவா.

<sup>28</sup>நிங்க ஆக்காக அஞ்சத்துள்ளா ஆவிசெ இல்லெ; நிங்க ஆக்காக அஞ்சாதெ ஜீவுசதாப்பங்ங, தெய்வ நிங்கள காக்கு ஹளிட்டுள்ளுதும், ஆக்கள சிட்ச்சிசுகு ஹளிட்டுள்ளுதும் ஒக்க ஆக்க மனசிலுமாடுரு; இது தெய்வ பீத்தா ஒந்து அடெயாள தென்னெயாப்புது. <sup>29</sup>ஏனாக ஹளிங்ங கிறிஸ்தினமேலெ நம்பிக்கெ பீப்பத்தெ மாத்தற அல்ல, கிறிஸ்திக பேக்காயி கஷ்டப்பாடும், உபத்தரங்ஙளும் சகிப்பத்துள்ளா பாக்கியகூடி நிங்காக கிட்டிஹடதெ. <sup>30</sup>பண்டு நனங்ங பந்தா கஷ்டப்பாடும் உபத்தரங்ஙளும், ஒக்க நிங்க கண்டுதீரெ; ஈக நா சகிப்பா கஷ்டப்பாடும், உபத்தரங்ஙளும் நிங்காக கொத்துட்டல்லோ! அதே கஷ்டப்பாடும், உபத்தரங்ஙளும் தென்னெயாப்புது நிங்காகும் உள்ளுது.

1. சபெயாளெ மற்றுள்ளாக்கள ஒர்ப்பங்ங ஆக்காக பேக்காயி பிரார்த்தனெ கீதீரெயோ?
2. கிறிஸ்து நங்கள எந்த்தெ ஆப்புது சினேகிசுது? மற்றுள்ளாக்களமேலெ நங்க அந்த்தெ சினேக காட்டினோ?
3. பிலிப்பி சபெயாளெ உள்ளாக்க ஒள்ளெவர்த்தமான எந்த்தெ அறிசிரு? ஏனகொண்டு?
4. பவுலு ஜெயிலாளெ இப்புது அருது செலாக்க ஏது பிஜாரதாளெ ஒள்ளெவர்த்தமான அறிசிரு? பவுலா மறுபடி ஏனாயித்து?
5. நங்கள ஜீவித ஏறங்ங ஒள்ளெ ஹெசறு இருக்கு? பவுலா ஜீவித ஏறங்ங ஒள்ளெ ஹெசரு உள்ளுதாயித்து?
6. ஏசிக பேக்காயி பாடுபட்டுதன பாக்கிய ஹளி ஒர்த்துதீரெயோ?

ஒப்பாங் ஜீவோடித்தங்ஙம், சத்தங்ஙம் தெய்வாக ஒள்ளெ ஹெசறு உட்டாப்பா இருக்கு.

நா நிங்கள அரியெ இத்தங்ஙம், தூரதாளெ இத்தங்ஙம் செரி, கிறிஸ்தின ஒள்ளெவர்த்தமானாக ஏற்றா ஹாற நெடதணிவா!

ஒள்ளெவர்த்தமானாக பேக்காயி ஒப்பங்ஙம் அஞ்சத்துள்ளா ஆவிசெ இல்லெ; ஒள்ளெவர்த்தமானாக பேக்காயி நா பட்டா கஷ்டப்பாடு மாத்தறே நிங்காக ஒள்ளெ. (மத்தாயி 10:19)

கிறிஸ்திகபேக்காயி கஷ்ட சகிப்புது பாக்கிய ஹளி பவுலு ஹளிதீனெ



### ஏசுக்கிறிஸ்தின தாழ்மெ (2:1-11)

**2** கிறிஸ்தினகூடெ ஒந்தாயிற்றெ இப்புதுகொண்டு நிங்காக ஒள்ளெ தைரெயும், தன்ன சினேகங்கொண்டு ஆசுவாசம், பரிசுத்த ஆல்ப்மாவினகூடெ ஒந்து பெந்தம் உட்டல்லோ? கிறிஸ்திக நிங்களமேலெ கருணையும், தயவும் உட்டல்லோ? <sup>2</sup> அந்த்தெ ஆயித்தங்ங, நிங்ககூக்க ஒந்தே மனசோடும், தம்மெலெ தம்மெலெ சினேக உள்ளாக்களாயும், ஒரிமெ உள்ளாக்களாயும் நன்ன கூடுதலு சந்தோஷப்படிசிவா. <sup>3</sup> நானே தொட்டாவங் ஹளி பெருமெ ஹளிண்டும், வாசி ஹிடுத்தண்டும் ஒந்நனும் கீயிவத்தெ நில்லுவாட; நிங்க தம்மெலெ தாழ்மெ உள்ளாக்களாயிரிவா; மற்றுள்ளாக்கள நிங்களகாட்டிலும் தெட்டாவாங் ஹளி பிஜாரிசிவா. <sup>4</sup> நிங்களகாரெ மாத்தறல்ல நோடபேக்காத்து, மற்றுள்ளாக்கள காரெயும் நோடி சகாசிகொடுக்கு. <sup>5</sup> அதுகொண்டு நிங்களும் கிறிஸ்து ஏசின மனசு உள்ளாக்களாயிரிவா.

<sup>6</sup> எந்த்தெ ஹளிங்ங, ஏசுக்கிறிஸ்து தெய்வமாயி இத்தட்டுகூடி,

தெய்வாக சமமாயிற்றெ இப்பா அதிகாரத உபயோகிசிபில்லெ.

<sup>7</sup> அதனொக்க மாற்றிபீத்தட்டு,

ஒந்து அடிமெதஹாற தன்னதென்னெ தாழ்த்தி ஒந்து மனுஷனாயி ஹூட்டிதாங்.

<sup>8</sup> அந்த்தெ தாங் மனுஷனாயிற்றெ,

தன்னத்தானே தாழ்த்தி குரிசாமேலெ தறெச்சு கொல்லத்தெகூடி தன்ன ஏல்சிதாங்.

<sup>9</sup> அதுகொண்டு தெய்வ ஏசுக்கிறிஸ்திக தொட்ட ஸ்தான கொட்டு உயர்த்தி,

எல்லா ஹெசறின காட்டிலும் மேலேகுள்ளா தொட்ட ஹெசறு

கொட்டு ஜீவோடெ ஏளிசித்து.

<sup>10</sup> அதுகொண்டு ஏசின ஹெசறு ஹளிங்ங,

சொர்க்காளெ உள்ளாக்க, பூமியாளெ உள்ளாக்க, பாதாளாளெ உள்ளாக்க

எல்லாரும் முட்டுக்காலு ஹைக்கிட்டு,

<sup>11</sup> ஏசுக்கிறிஸ்து தென்னெயாப்புது நங்கள எஜமானு ஹளி, ஆக்கள பாயாளே ஹளுரு.

அதுகொண்டு நங்கள அப்பனாயிப்பா தெய்வாக மரியாதெயும் உட்டாக்கு.

### தன்ன இஷ்டப்பிரகார கீவத்துள்ளா ஆக்கிரகும் சக்தியும் தெய்வ (2:12-18)

<sup>12</sup> அதுகொண்டு நன்ன சினேகுள்ளா கூட்டுக்காரே, நிங்க ஏகோத்தும் தெய்வ ஹளிதன அனிசரிசி நெடிவாஹாறதென்னெ, நிங்கள ரெட்ச்செகபேக்காயி வளரெ அஞ்சிக்கெ பெறலோடெ கெலசகீதணிவா; நா நிங்களகூடெ இப்பங்ங கீதாஹாற அல்ல, நா நிங்கள அரியெ இல்லாதிப்பா சமெயாளெயும் அதனகாட்டிலும் கூடுதலு அனிசரிசி நெடிக்கு.

<sup>13</sup> ஏனாக ஹளிங்ங, தன்ன இஷ்டப்பிரகார கீவத்துள்ளா ஆக்கிரகும் சக்தியும் தெய்வ தென்னெயாப்புது நிங்காக தப்புது.

நானே தொட்டாவாங் ஹளிட்டுள்ளா பெருமெயோ வாசி காட்டி ஒந்நனும் கீயிவத்தெ நில்லுவாட.

தம்மெலெ தாழ்மெ உள்ளாக்களாயி இருக்கு. நிங்களகாட்டிலும் மற்றுள்ளாக்கள தெட்டாவாங் ஹளி பிஜாருசுக்கு.

ஏசு தெய்வமாயி இத்தட்டும் குரிசமரணவரெ தன்னத்தானே தாழ்த்திதுகொண்டு எல்லாரும் அஞ்சி முட்டுகுத்தா அளவிகுள்ளா தொட்ட ஹெசறின கொட்டு தெய்வ போசித்து.

தெய்வ வாக்கின அனிசரிசி நெடிவாஹாற தென்னெ, நங்கள ரெட்ச்செகபேக்காயி வளரெ அஞ்சிக்கெ பெறலோடெ கெலசகீயிக்கு.

ஏதன கீதங்ஙம் குற்ற ஹளாதெயும், தர்க்கிசாதெயும் கீயிவா.

<sup>14</sup> அதுகொண்டு நிங்க ஏதன கீதங்ஙும் குற்ற ஹளாதெயும், தர்க்கிசாதெயும் கீயிவா. <sup>15</sup> அம்மங்ங ஈ குருத்தங்கெட்டாக்களும், ஒயித்தாயி நெடியாத்தாக்களும்மாயிப்பா ஜனத எடேக, சத்தியநேரு உள்ளாக்களாயும், குற்ற கொறவில்லாத்த தெய்வத மக்களாயும், ஆகாசாளெ மின்னா நச்சத்தறத ஹாற பொளிச்ச உள்ளாக்களாயும் ஜீவுசத்தெ பற்றுகு. <sup>16</sup> நித்தியஜீவங் தப்பா ஒள்ளெவர்த்தமானதாளெ ஹளிப்பா ஹாற நெடதணிவா; அம்மங்ங நா கஷ்டப்பட்டுதும் கெலசகீதுதும் ஒந்தும் பொருதெ ஆயிபில்லெ ஹளி கிறிஸ்து பொப்பா ஜினதாளெ நனங்ங நிங்களபற்றி பெருமெ ஹளத்தெ பற்றுகு. <sup>17</sup> எந்நங்ங நிங்காக பொப்பா உபத்தர ஒக்க சகிச்சண்டு தெய்வதமேலெ பீத்திப்பா நம்பிக்கெ தெய்வாக இஷ்டப்பட்டா ஹரெக்கெ தென்னெயாப்புது; அந்த்தெ ஜீவுசா நிங்காகபேக்காயி நா நன்ன ஜீவதே கொடத்தெ வேண்டிபந்நங்ஙும், அது நனங்ங சந்தோஷ தென்னெயாப்புது; நா நிங்க எல்லாரினகூடெயும் சந்தோஷப்படுவிங். <sup>18</sup> அதே ஹாற நிங்களும் சந்தோஷ உள்ளாக்களாயி இரிவா; நிங்க நன்னகூடெ கூடி சந்தோஷபடிவா.

### சொந்தகாரெ நோடாக்களும், தெய்வகாரெ நோடாக்களும் (2:19-24)

<sup>19</sup> நங்கள எஜமானாயிப்பா ஏசுக்கிறிஸ்து சகாசிங்ங, நா திமோத்தித நிங்களப்பெட பிரிக ஹளாயிச்சட்டு, நிங்கள விஷேஷ ஒக்க அருது ஆசுவாசபடக்கெ ஹளிண்டு இப்புதாப்புது. <sup>20</sup> நிங்களகாரெ ஒக்க பரமார்த்தமாயி அன்னேஷத்தெ மனசுள்ளாவாங் அவனல்லாதெ பேறெ ஒப்பனும் நா கண்டுபில்லெ.

<sup>21</sup> மற்றுள்ளாக்க ஒக்க அவாவன சொந்த காரெ நோடுதல்லாதெ ஏசுக்கிறிஸ்தின காரெ நோடாக்க ஒப்புரும் இல்லெ. <sup>22</sup> எந்நங்ங திமோத்தித ஒள்ளெ சொபாவ நிங்காக கொத்துட்டல்லோ? மக்க அப்பந்தீரா சகாசாஹாற, ஈ ஒள்ளெவர்த்தமான அருசத்தெபேக்காயி, அவங் நன்னகூடெ ஒந்துபாடு கஷ்டப்பட்டாவனாப்புது. <sup>23</sup> அதுகொண்டு நன்னகாரெ எந்த்தெஒக்க ஆக்கு ஹளி அருதட்டு, நிங்களப்பெட அவன பிரிக ஹளாயக்கெ ஹளிண்டிப்புதாப்புது. <sup>24</sup> தெய்வ சகாசிதங்ங நாணும் பிரிக நிங்களப்பெட பரக்கெ ஹளி நம்பிண்டு இப்புதாப்புது.

### எப்பாபிராத்தின திரிச்ச ஹளாயிப்புது (2:25-30)

<sup>25</sup> நிங்க நன்ன சகாசத்தெ பேக்காயி எப்பாப்பிராத்தின நன்னப்பெட ஹளாயிச்சுறல்லோ! அவன நா ஈக நிங்களப்பெட திரிச்ச ஹளாயிப்புது ஒள்ளேது ஹளி பிஜாருசுதாப்புது; அவனபற்றி ஹளுக்கிங்ஙி, அவங் நனங்ங ஒந்து கூடெஹுட்டிதா தம்மன ஹாரும், ஒந்து பட்டாளக்காறன ஹாரும் நன்னகூடெ இத்து கெலச கீவாவனாப்புது. <sup>26</sup> எந்நங்ங அவங் இல்லி சுகஇல்லாதெ இத்துது நிங்க அருதாகண்டு, நிங்க பேஜார ஹிடிப்புரு ஹளிட்டு அவனும் நிங்கள காம்பத்தெ ஆக்கிரிசினடித்தாங். <sup>27</sup> அவங் தெண்ண பந்தட்டு சாயிவத்தாயித்துது நேருதென்னெயாப்புது; எந்நங்ங தெய்வ அவனமேலெ கருணை காட்டி அவன சுகமாடித்து. அவன சுகமாடிது மாத்தறல்ல, நனங்ஙும் சங்கடத மேலெ சங்கட பாராதெ தெய்வ நன்னும் சகாசித்து. <sup>28</sup> அதுகொண்டு, நா அவன நிங்களப்பெட பிரிக ஹளாயிப்பத்தெ ஆக்கிருசுதாப்புது; அவன காம்பதாப்பங்ங நிங்காக ஒள்ளெ சந்தோஷ ஆக்கு; நிங்களபற்றிட்டுள்ளா நன்ன பேஜாரும் மாறுகு. <sup>29</sup> நிங்கள ஹாற தென்னெ ஏசின நம்பிப்பா அவன பூரண சந்தோஷத்தோடெ சீகரிசியணிவா. அந்த்தலாக்கள நிங்க

நா நிங்களகூடெ இப்பங்ஙும், கூடெ இல்லாதிப்பங்ஙும் ஒந்தேஹாற அதனகாட்டிலும் கூடுதலு அனிசரிசி நெடக்கு.

சொந்தகாரெ நோடாக்களாயி அல்ல தெய்வகாரெ நோடாக்களாயி இருக்கு.

கிறிஸ்தின கெலசாகபேக்காயி எப்பாபிராத்து தன்ன ஜீவதகூடி தொட்டுது ஹளி பிஜாரிசிபில்லெ. தெண்ணதாளெ இப்பாக்காக பேக்காயி பிரார்த்தனெ கீயிக்கு.

பெகுமானுசுக்கு. <sup>30</sup> ஏனாக ஹளிங்ங, நிங்க நன்னகூடெ இத்து, நனங்ங கீதுதப்பத்தெ உள்ளுதனொக்க அவங் நனங்ங கீதுதந்நா; அவங் இல்லிக பந்திப்பங்ங தெண்ணபந்து சாயிவத்தெ ஆயித்தாங்; எந்நங்ங அவங் கிறிஸ்தின கெலசாகபேக்காயி தன்ன ஜீவதகூடி தொட்டுது ஹளி பிஜாரிசிபில்லெ.

1. கிறிஸ்தினகூடெ ஒந்தாயி இப்பா நங்க எந்த்தெ ஆப்புது இறபேக்காத்து? மற்றுள்ளாக்கள நங்க எந்த்தெ பிஜாருசுக்கு?
2. ஏசு எந்த்தெ தன்ன தாழ்த்திது? அதுகொண்டு ஏசிக ஏன கிடுத்து?
3. நங்கள ரெட்ச்செக பேக்காயி நங்க எந்த்தெ நெடிக்கு?
4. கிறிஸ்து பொப்பா ஜினாளெ தெற்றுகுற்ற கீவாக்கள எடேக நங்க எந்த்தெ ஆப்புது இறபேக்காத்து?
5. அவங் அந்த்தெ இவங் இந்த்தெ ஹளி மற்றுள்ளாக்கள தாத்திகெட்டிதீரெயோ?
6. ஏதாப்புது நங்கள ஜீவிதாளெ தொட்டகாரெ?
7. தெய்வகெலச எந்த்தெகீயிக்கு? ஆளா காமங்ங ஒந்து காணாதிப்பங்ங ஒந்து நெடத்தெ உட்டோ?
8. ஏதிங்ஙி காரெக தர்க்கிசி கீதுதீரெயோ?

### ஒந்நங்ஙம் கொள்ளத்த மத ஆஜார (3:1-7)

**3** நன்ன கூட்டுக்காரே, நங்கள எஜமானாயிப்பா ஏசின நம்பி நெடிவுதுகொண்டு நிங்க சந்தோஷபடிவா; ஈக ஹளத்தெ ஹோப்பா காரெ ஒக்க, நா நேரத்தே நிங்காக எளிதி ஹடதெ; எந்நங்ங நா அதனதென்னெ திரிச்சும் எளிவுதனாளெ நனங்ங சங்கட ஒந்தும் இல்லெ; நா எளிவுது ஒக்க நிங்கள ஒள்ளேதங்ங பேக்காயிதென்னெ. <sup>2</sup> நிங்களகூடெ சுன்னத்து கீயிக்கு ஹளி ஹளா யூதம்மாரா குறிச்சு ஜாகர்தெயாயிற்றெ இத்தணிவா; ஆக்க நேராயிற்றெ ஏசின நம்பாக்களல்ல, ஆக்க துஷ்டம்மாராயிப்பா கெலசகாராப்புது. <sup>3</sup> எந்த்தெ ஹளிங்ங தெய்வத ஆல்ப்மாவின் சகாயதாளெ தெய்வத கும்முட்டு கிறிஸ்து ஏசின நம்பி சந்தோஷப்படா நங்களாப்புது தெய்வத எதார்த்தமாயிற்றுள்ளா மக்க; அல்லாதெ மனுஷம்மாரு பெருமெ ஹளிண்டு நெடிவா காரெத எத்திண்டு நெடிவாக்களல்ல. <sup>4</sup> மனுஷம்மாரு பெருமெ ஹளிண்டு நெடிவா காரெதபற்றி, பேக்கிங்ஙி நனங்ஙம் ஹளிண்டு நெடியக்கெ. நிங்களாளெ ஏரிங்ஙி ஒப்பங்ங இந்த்தல காரெயாளெ பெருமெ ஹளத்துட்டிங்ஙி, நனங்ங அதனகாட்டிலும் கூடுதலு ஹளத்தெ உட்டு. <sup>5</sup> என்கொண்டு ஹளிங்ங, நா இஸ்ரேல் ஜாதிக்காறங், பென்யமீன் தறவாடாளெ ஹூட்டிதாவாங், நன்ன அப்பனும், அவ்வெயும் எதார்த்தமாயிற்றுள்ளா எபிரெயக்காறாப்புது; ஹூட்டி எட்டாமாத்த ஜினாளெ நனங்ங சுன்னத்துகீதுரு, இஸ்ரேல்காறிக கொட்டிப்பா நேமதாளெ ஹளிப்புதன ஒக்க ஒயித்தாயி அனிசரிசி நெடிவா பரீசம்மாராளெ ஒப்பனும் ஆப்புது. <sup>6</sup> யூத மதாமேலெ கூடுதலு பக்தி உள்ளுதுகொண்டு கிறிஸ்தின நம்பா ஆளக்காறா உபத்தர கீதண்டித்தாவனாப்புது; ஆ நேமதாளெ ஹளிப்புதன ஒக்க அனிசரிசி நெடதுது கொண்டு ஒப்புரும் நன்ன குற்ற ஹளத்தெ பற்றிப்பில்லெ. <sup>7</sup> எந்நங்ங நா நேரத்தெ தொட்டுது ஹளி பிஜாரிசிண்டித்தா எல்லா காரெதும், இந்து கிறிஸ்திக பேக்காயி ஒந்து பெலெயும் இல்லாத்துதாயிற்றெ கணக்குமாடிதிங்.

### ஏசின ஜீவோடெ ஏள்சிதா சக்தி (3:8-11)

<sup>8</sup> அதுமாத்தற அல்ல, நன்ன எஜமானாயிப்பா கிறிஸ்து ஏசினபற்றிட்டுள்ளா காரெ கொத்துமாடுதாப்புது நனங்ங தொட்ட சொத்து; அதங்ஙபேக்காயி இதுவரெட்ட நா தொட்டுது ஹளி பிஜாரிசிண்டித்தா எல்லதனும் ஒந்தும் இல்லெ ஹளி பிஜாருசுதாப்புது; கிறிஸ்து ஏசிகபேக்காயி எல்லதனும் நஷ்ட ஹளி புட்டுட்டிங்; நன்ன ஏசினபற்றி நனங்ங கூடுதலு மனசிலுமாடத்தெ பேக்காயி மற்றுள்ளா எல்லதனும் குப்பெஹாற ஆப்புது பிஜாருசுது. <sup>9</sup> நா ஏசுக்கிறிஸ்தினகூடெ இப்பத்தெ பேக்காயாப்புது அந்த்தெ கீதுது; இஸ்ரேல்காறிக கொட்டா நேமத அனிசரிசி நெடிவுதுகொண்டு நா சத்திய நேருள்ளாவனாயிற்றெ

சுன்னத்து, மத ஆஜார, இதொக்க ஒந்நங்ஙம் கொள்ளத்துதாப்புது. கிறிஸ்து ஏசின நம்பி சந்தோஷப்படா நங்களாப்புது தெய்வத எதார்த்தமாயிற்றுள்ளா மக்க.

ஆப்பத்தெபற்ற ஹளியும், தெய்வ நன்ன சத்திய நேருள்ளாவனாயிற்றெ காணுக்கிங்நி, நா கிறிஸ்தின நம்புக்கு ஹளியும் நா மனசிலுமாடிதிங்; அந்த்தெ கிறிஸ்தின நம்புதுகொண்டு தெய்வத முந்தாக சத்தியநேரு உள்ளாவனாயிற்றெ ஆப்பத்தெஆப்புது நா ஆக்கிருசுது. <sup>10</sup> கிறிஸ்தினபற்றி நனங்ங கூடுதலாயிற்றெ அறிக்கு ஹளி ஆக்கிருசுதாப்புது; அதுமாத்தறல்ல, சத்தாக்கள எடெந்த கிறிஸ்தின ஜீவோடெ ஏள்சிதா ஆ, சக்தி நனங்ங கூடுதலாயி கிட்டத்தெ பேக்காயும், கிறிஸ்து சகிச்சா கஷ்டதாளெ ஒக்க பங்குள்ளாவனாயிற்றெ ஆப்பத்தெகும், கிறிஸ்து சத்தா ஹாற தென்னெ சாயிவத்தெயும் ஆப்புது நா ஆக்கிருசுது. <sup>11</sup> அந்த்தெ, சத்தாக்கள எடெந்த தெய்வ ஜீவோடெ ஏளுசாக்கள கூட்டதாளெ எந்த்தெங்கிலும் நனங்ஙம் ஜீவோடெ ஏளுக்கு.

### தெய்வ தெரெஞ்ஞெத்திதன உத்தேச, கிறிஸ்து தப்பா சம்மான (3:12-14)

<sup>12</sup> இதுதொக்க நனங்ங கிடுத்து ஹளியோ, நா தெகெஞ்ஞாவனாயுட்டிங் ஹளியோ பிஜாரிசிபில்லெ; கிறிஸ்து ஏசு நன்ன தெரெஞ்ஞெத்திதுகொண்டு, தாங் ஆக்கிரிசிதா ஹாற உள்ளா ஒந்து மனுஷனாயி ஆப்பத்தெ நா தொடர்ந்நு கஷ்டப்படுதே ஒள்ளு; இதுதொக்க தென்னெயாப்புது நன்ன உத்தேச. <sup>13-14</sup> ஏசின நம்பா நன்ன கூட்டுக்காரே, ஆ உத்தேசத கீதுத்திங் ஹளி நா பிஜாரிசிபில்லெ; நித்திய ஜீவனாயிப்பா சம்மானத கிறிஸ்து ஏசினகொண்டு தெய்வ நங்காக தக்கு; ஆ சம்மானாக பேக்காயி ஆப்புது சொர்க்காளெ இப்பா தெய்வ நன்னும் ஊதிப்புது; அதுகொண்டு, ஆ சம்மான கிட்டத்தெபேக்காயி நா ஒந்துகாரெ கீவுதாப்புது; ஹளேகாரெ ஒக்க மறதட்டு, இனி நெடிவத்துள்ளுதன முந்தாக கண்டண்டு, ஒந்து ஓட்டக்காறன ஹாற நா கஷ்டப்பட்டு ஓடுதாப்புது.

### தெய்வ இஷ்ட அருது ஜீவுசா ஜீவித

<sup>15</sup> அதுகொண்டு நங்களாளெ தெய்வகாரெ அனிசருசுதுனாளெ தெகெஞ்ஞாக்க எல்லாரும், ஈ சிந்தெ உள்ளாக்களாயிருக்கு; ஏதிங்நி காரெயாளெ நிங்க பேறெ ஏனிங்நி சிந்தெ உள்ளாக்களாயி இத்துதுட்டிங்நி அதன பற்றிட்டுள்ளா சத்திய ஏனொக்க ஹளி தெய்வ நிங்காக மனசிலுமாடி தக்கு. <sup>16</sup> ஏன ஆதங்ங செரி, இதுவரெ நங்க எந்த்தெஒக்க தெய்வகாரெபற்றி படிச்சு நெடதனோ அதே ஹாற தென்னெ இனியும் நெடதனுக்கு.

### நசிச்சு ஹோப்பா மனுஷ சரீரம், கிறிஸ்தினகொண்டு கிட்டா நசியாத்த சரீரம்

<sup>17</sup> நன்ன கூட்டுக்காரே, நிங்க எல்லாரும் நன்ன ஜீவித கண்டு படிச்சணிவா. நிங்கள எடேக, நங்க ஜீவிசி காட்டிதா ஹாற தென்னெ நெடிவாக்க இத்தீரல்லோ! ஆக்களும் கண்டு படிச்சணிவா. <sup>18</sup> நா ஏனாக ஹளுது ஹளிங்ங, செல ஆள்க்காறாபற்றி, நா நேரத்தெ பல தவணெ நிங்களகூடெ ஹளித்திங்; ஈகளும் நா சங்கடத்தோடெ ஹளுதாப்புது; கிறிஸ்து குரிசாமேலெ சத்துதுகொண்டு, ஆக்கள ஜீவிதாளெ கீதுகொட்டுது ஏனாப்புது ஹளி அருதட்டும் அதங்ங எதிராயிற்றெ ஆப்புது ஆக்க கீவுது. <sup>19</sup> அந்த்தலாக்க எல்லாரிகும் தெய்வ சிட்ச்செ கொடுகு; அதாப்புது ஆக்கள அவசான; ஏனகொண்டு ஹளிங்ங, தெய்வத காரெ காட்டிலும் தொட்டுது ஆக்கள ஹொட்டெகுள்ளா காரெ ஆப்புது;

நித்திய ஜீவனாயிப்ப சம்மானாக பேக்காயாப்புது கிறிஸ்து நங்கள ஊதிப்புது. ஹளேகாரெ ஒக்க மறதட்டு, இனி நெடிவத்துள்ளுதன முந்தாக கண்டண்டு, ஒந்து ஓட்டக்காறன ஹாற ஓடுக்கு.

இதுவரெ நங்க எந்த்தெஒக்க தெய்வகாரெபற்றி படிச்சு நெடதனோ அதே ஹாற தென்னெ இனியும் நெடதனுக்கு.

நங்கள சொந்த ராஜெ, நங்கள எஜமானாயிப்பா ஏசுக்கிறிஸ்து இப்பா சொர்க்கராஜெ ஆப்புது



நாணங்கெட்டா காரெ ஆப்புது ஆக்காக மதிப்பாயிற்றெ உள்ளுது; ஈ லோகக்காரெ தென்னெ தொட்டுது ஹளி பிஜாரிசிண்டு நெடிவாக்களாப்புது ஆக்க. <sup>20</sup> எந்நங்ங நங்கள சொந்த ராஜெ, நங்கள எஜமானாயிப்பா ஏசுக்கிறிஸ்து இப்பா சொர்க்கராஜெ ஆப்புது; நங்கள காப்பாவனாயிப்பா ஏசுக்கிறிஸ்து அல்லிந்த பந்தட்டு நங்கள எல்லாரினும் கூட்டிண்டுஹோப்பாங் ஹளிட்டுள்ளா நம்பிக்கெயாளெ காத்தித்தீனு.

<sup>21</sup> கிறிஸ்து பொப்பதாப்பங்ங தன்ன சக்திகொண்டு, சீது ஹோப்பா நங்கள சரீரத, பொளிச்ச உள்ளா தன்ன அதிசய சரீரத ஹாற தென்னெ மாற்றுவாங்; தாங் எல்லதனும் தன்னகீளெக கொண்டுபொப்பத்தெகும் கழிவுள்ளாவனாப்புது.

1. ஏறாப்புது எதார்த்தமாயிற்றுள்ளா தெய்வத மக்க?
2. ஏசினபற்றி அறிவுதனமுச்செ நிங்க ஏதனபற்றி தொட்டுது ஹளிண்டித்துரு?
3. கிறிஸ்தின கண்டுமுட்டிதா நிங்க, அதங்ங பேக்காயி ஏதிங்ஙி நஷ்டமாயி புட்டுறோ?
4. தெய்வத முந்தாக சத்தியநேருள்ளக்களாயி ஆவுக்கிளுங்ஙி நங்க ஏனாப்புது கீயபேக்காத்து?
5. கிறிஸ்து பவுலின ஏனாக பேக்காயி ஊதிப்புது ஹளி ஹளினை? நங்களும் கிறிஸ்து ஏனாக ஊதிப்புது? அதங்ங ஏதன மறது ஓடுக்கு?
6. தெய்வகாரெ படிச்சங்ங மதியோ? ஏனாப்புது கீயபேக்காத்து?
7. ஏதாப்புது நங்கள சொந்தராஜெ? அல்லி நங்காக எந்த்தல சரீர கிட்டுகு?
8. பவுலிக ஏதனபற்றி பெருமெ ஹளத்தெ உட்டாயித்து? ஏதாப்புது எதார்த்த பெருமெ?

### பவுலு புத்தி ஹளிகொடுது

**4** அதுகொண்டு, ஏசின நம்பா நன்ன கூட்டுக்காரே, நிங்க ஏகோத்தும் ஏசுக்கிறிஸ்தின சினேகதாளெ தென்னெ ஜீவிசிவா; நன்ன சந்தோஷபடுசாக்களும், நன்ன சொத்தும் நிங்கதென்னெயாப்புது; நன்ன சினேக உள்ளாக்களும், நா காம்பத்தெ ஆக்கிருசாக்களும், நிங்கதென்னெயாப்புது. <sup>2</sup> எவோதி, சிந்தெகி நிங்க இப்புரும் எஜமானாயிப்பா ஏசுக்கிறிஸ்திக வேண்டப்பட்டாக்களாப்புது; அதுகொண்டு நிங்க தம்மெலெ ஜெகளகூடாதெ சமாதான உள்ளாக்களாயி இரிவா ஹளி, நா நிங்காக புத்திஹளுதாப்புது. <sup>3</sup> தெய்வ கெலசதாளெ நன்ன சகாசா கூட்டுக்காரா! ஆ திங்கெயாடுரு இப்புரும் ஒத்தொரிமெயாயிற்றெ இப்பத்தெ சகாசிகொடுக்கு ஹளி நா நின்னகூடெ ஹளுதாப்புது; ஆக்க கிலமெந்தினகூடெயும், மற்றுள்ளா நன்ன கூட்டுக்காராகூடெயும், நன்னகூடெயும் ஒள்ளெவர்த்தமான அருசா கெலசாகபேக்காயி ஒந்துபாடு கஷ்டப்பட்டாக்களாப்புது; ஆக்க எல்லாரின ஹெசறும் தெய்வத ஜீவபுஸ்தகதாளெ எளிதி ஹடதெ.

### தொட்ட சமாதான

<sup>4</sup> எஜமானாயிப்பா ஏசின நம்பி நெடிவுதுகொண்டு ஏகோத்தும் சந்தோஷமாயிற்றெ இரிவா; சந்தோஷமாயிற்றெ இரிவா ஹளி நா ஹிந்திகும் ஹளுதாப்புது. <sup>5</sup> அதுமாத்தறல்ல, நங்கள

சீது ஹோப்பா நங்கள சரீரத, பொளிச்ச உள்ளா தன்ன அதிசய சரீரத ஹாற தென்னெ ஏசு மாற்றுவாங்.

தம்மெலெ தம்மெலெ ஜெகளகூடாதெ சமாதான உள்ளாக்களாயும், ஒத்தொரிமெ உள்ளாக்களாயும் இருக்கு.

ஏசின நம்பி நெடிவுதுகொண்டு ஏகோத்தும் சந்தோஷமாயிற்றெ இருக்கு.

எஜமானாயிப்பா ஏசு பொப்பத்துள்ளா ஜின அடுத்துத்து, அதுகொண்டு நிங்க எல்லா மனுஷராசுகுடெயும் தாழ்மெ உள்ளாக்களாயி நெடதணிவா.

<sup>6</sup>ஏகோத்தும் நிங்க தெய்வதகூடெ பிரார்த்தனெ கீயிவா; நிங்கள ஆவிசெயாங்ஙளு ஒக்க தெய்வதகூடெ ஹளிவா; அந்த்தெ நிங்க பிரார்த்தனெ கீவதாப்பங்ங தெய்வாக நண்ணி உள்ளாக்களாயிப்புரு. <sup>7</sup>அந்த்தெ பிரார்த்தனெ கீவதாப்பங்ங, தெய்வத கையிந்த நிங்காக அளவில்லாத்த சமாதான கிட்டுகு; ஈ சமாதான, நிங்கள மனசினாளெ அஞ்சிக்கெயும், மற்றுள்ளா சிந்தெயும் பாராதெ காத்தங்கு; ஈ சமாதான கிறிஸ்து ஏசின நம்பி ஜீவுசா எல்லாரிகும் உள்ளுதாப்புது.

### தெய்வத காழ்ச்செயாளெ செரியுள்ளா ஜீவித

<sup>8</sup>அதுகொண்டு ஏசின நம்பா நன்ன கூட்டுக்காரே! நிங்களகூடெ ஒந்து காரெகூடி நனங்ங ஹளத்துள்ளுது ஏன ஹளிங்ங, ஏகோத்தும் நிங்க ஒள்ளெகாரெயும், சத்தியநேரு உள்ளா காரெயும், தெற்று குற்ற, இல்லாத்த காரெயும், எல்லாரும் இஷ்டப்படா காரெயும் மாத்தற சிந்திசிவா. <sup>9</sup>நன்ன ஜீவிதாளெ நிங்க கண்டுதனும் கேட்டுதனும், நா நிங்காக படிசிதனும், நிங்க படிச்ச மனசிலுமாடிதனும் ஒக்க கீதண்டிரிவா; அம்மங்ங சமாதான தப்பா தெய்வ நிங்களகூடெ இக்கு.

### ஏது சாஜரியதளெயும் ஜீவுசத்தெ படிச்சது, உபகாராக பவுலு நண்ணி ஹளுது

<sup>10</sup>நேரத்தெ நிங்க நன்ன சகாசிண்டித்தா ஹாற தென்னெ ஹிந்திகும் சகாசுக்கு ஹளி தோநிது ஓர்த்து நா கூடுதலு சந்தோஷபடுதாப்புது; நன்ன சகாசுக்கு ஹளிட்டுள்ளா மனசு நிங்காக ஏகோத்தும் உட்டு ஹளி நனங்ங கொத்துட்டு; எந்நங்ங அதங்ஙள்ளா சமெ நிங்காக கிட்டிபில்லெ. <sup>11</sup>நனங்ங ஏனொக்கோ புத்திமுட்டு, அதுகொண்டாப்புது நா இந்த்தெ ஒக்க நிங்களகூடெ ஹளுது ஹளி பிஜாருசுவாட; ஏனாக ஹளிங்ங, ஏது சாஜரியதாளெ இத்தங்ஙம், திருப்தியாயிற்றெ ஜீவுசத்தெ நா பளகி ஹடதெ. <sup>12</sup>கஷ்டதாளெ ஜீவுசத்தெகும், சுகதாளெ ஜீவுசத்தெகும் கொத்துட்டு; ஹொட்டெதும்ப திம்பத்தெ இத்தங்ஙம் செரி, ஹட்டிணி இப்பத்தெ வேண்டிபந்நங்ஙம் செரி, நனங்ங கொறச்சே ஒள்ளெங்கிலும் செரி, தும்ப இத்தங்ஙம் செரி, ஏது சாஜரியதாளெ ஆதங்ஙம், நா ஜீவுசத்தெ படிச்ச ஹடதெ. <sup>13</sup>நா கிறிஸ்தின நம்பி நெடெவுதுகொண்டும், கிறிஸ்து நனங்ங சக்தி தந்நண்டிப்புது கொண்டும், ஏது சாஜரியதாளெயும் சந்தோஷமாயிற்றெ ஜீவுசத்தெ பற்றுகு. <sup>14</sup>எந்நங்கூடி நன்ன புத்திமுட்டு சமெயாளெ நிங்க நன்ன சகாசிது வளரெ ஒள்ளேதாத்து.

### சகாய கீதாக்காக தெய்வ சகாய கிட்டத்தெ பேக்காயி பிரார்த்தனெ கீவுது

ஏசு பொப்பத்துள்ளா ஜின அடுத்திப்புது கொண்டு நங்க எல்லாரினகூடெயும் தாழ்மெ உள்ளாக்களாயி நெடதணக்கு.

நங்கள ஆவிசெயாங்ஙளு ஒக்க தெய்வதகூடெ ஹளுக்கு.

ஏகோத்தும் ஒள்ளெகாரெயும், சத்தியநேரு உள்ளா காரெயும், தெற்று குற்ற, இல்லாத்த காரெயும், எல்லாரும் இஷ்டப்படா காரெயும் மாத்தற சிந்திசிங்ங சமாதான தப்பா தெய்வ கூடெ இக்கு.

நிங்க நன்ன சகாசிண்டித்தா ஹாற தென்னெ ஹிந்திகும் சகாசுக்கு ஹளி தோநிது ஓர்த்து நா கூடுதலு சந்தோஷபடுதாப்புது.

<sup>15</sup> பிலிப்பி பட்டணதாளெ ஏசின நம்பி ஜீவுசா நன்ன கூட்டுக்காரே, நா முந்தெ நிங்களப்பெட பந்தட்டு, நிங்களகூடெ ஒள்ளெவர்த்தமான அறிசினல்லோ! அதுகளிட்டு நா அல்லிந்த மக்கதோனியா நாடிக ஹோப்பதாப்பங்ங, நிங்களல்லாதெ பேறெ ஒந்து சபெக்காரும் நன்ன செலவிக உள்ளா ஹண தந்து சகாசிபில்லெ; அது நிங்காக கொத்துட்டல்லோ? <sup>16</sup> நா தெசலோனியாளெ இப்பா சமெயாளெகூடி நிங்க, எருடு பரச நன்ன ஆவிசெக சகாசிரு. <sup>17</sup> எந்நங்ங நிங்க ஏனிங்ஙி தருக்கு ஹளிிட்டல்ல, நா இதொக்க ஹளுது; நிங்க கீவா ஒள்ளெ காரெ எல்லதங்ஙம், தெய்வ நிங்கள ஒந்துபாடு அனுகிருசுகு; அது ஆக்கிரிசிட்டாப்புது நா இதொக்க நிங்களகூடெ ஹளுது. <sup>18</sup> நன்ன செலவிக பேக்காயி நிங்க எப்பாப்பிராத்தின கையிகொட்டு புட்டுது ஒக்க, அவங் நன்னகையி கொண்டு தந்நா; நா ஈக திருப்தியாயிற்றெ இத்தீனெ; அதனாளெ பாக்கியும் ஹடதெ. நிங்க அயெச்சா ஈ காணிக்கெ ஒக்க தெய்வாக இஷ்டப்பட்டா, ஒள்ளெ வாசனெ உள்ளா ஹரெக்கெ ஆப்புது. <sup>19</sup> நங்கள தெய்வதகையி அளவில்லாத்த அனுக்கிரக ஹடதெ; ஆ அனுக்கிரகங்கொண்டு கிறிஸ்து ஏசின நம்பி ஜீவுசா நிங்கள புத்திமுட்டு ஒக்க தெய்வ மாற்றி தக்கு. <sup>20</sup> அந்த்தெ நங்கள சகாசா அப்பனாயிப்பா தெய்வாக எந்தெந்தும் மரியாதெ உட்டாட்டெ; ஆமென்.

### அன்னேஷண ஹளுது

<sup>21</sup> கிறிஸ்து ஏசின நம்பி ஜீவுசா பிலிப்பியாளெ இப்பா பரிசுத்தம்மாரு எல்லாரினும் நா கேட்டுத்து ஹளி ஹளிவா; நன்னகூடெ இப்பா நன்ன கூட்டுக்காரு எல்லாரும் நிங்களபற்றி கேட்டண்டித்துரு. <sup>22</sup> ஏசின நம்பா பரிசுத்தம்மாரு எல்லாரும் நிங்கள கேட்டண்டித்துரு; ராஜ கொட்டாரதாளெ இப்பா ஜோலிக்காரு ஒக்க பிறித்தியேகிச்சு நிங்கள கேட்டண்டித்துரு. <sup>23</sup> நங்கள எஜமானாயிப்பா ஏசுக்கிறிஸ்து நிங்க எல்லாரிகும் கருணெ காட்டட்டெ.

1. ஏறன சினேகதாளெ நெலெச்சிருக்கு? ஏசின நம்பா நங்க தம்மெலெ தம்மெலெ எந்த்தெ நெடிக்கு?
2. ஏனகொண்டு நங்க தாழ்மெ உள்ளாக்களாயி நெடிக்கு?
3. நங்கள ஆவிசெ ஏறனகூடெ ஹளுக்கு?
4. நங்கள மனசினாளெ அஞ்சிக்கெயும் மற்று சிந்தெயும் பாராதிருக்கிங்ஙி நங்காக ஏன பேக்கு?
5. தெய்வ நங்களகூடெ இருக்கிங்ஙி நங்க ஏன கீயிக்கு?
6. மற்றுள்ளாக்கள கஷ்டதாளெ நங்க சகாசிதீனோ?
7. நங்க தெய்வகெலசாக பேக்காயி கொடா காணிக்கெ எந்த்தெ உள்ளுது?
8. நங்கள புத்திமுட்டு ஒக்க எந்த்தெ மாருகு?

நிங்க அயெச்சா ஈ காணிக்கெ ஒக்க தெய்வாக இஷ்டப்பட்டா, ஒள்ளெ வாசனெ உள்ளா ஹரெக்கெ ஆப்புது.

கிறிஸ்து ஏசின நம்பி ஜீவுசா நங்கள புத்திமுட்டு ஒக்க தெய்வ மாற்றி தக்கு.

